

全五代詩附補遺

四



全 五 代 詩
附 補 遺

(四)

李 調 元 編

全五代詩卷十九

吳

曹松

松字夢徵舒州人學賈島為詩久困名場昭宗天復初與王希羽等五人同登第時號五老榜

授祕書省正字

唐音戊籤昭宗實錄天復元年敕文令中書門下選擇新及第進士中有久在名場晚沾科級年齒已高者不拘常例各授一官於是禮部侍郎杜德祥奏揀到新及第進士陳光問年六十九曹松年五十

四王希羽年七十三劉象年七十柯崇年六十四鄭希顏年五十九詔光問松希羽可祕書省正字象崇希顏可太子校書時上新平內難授官制詞有念爾登科之際當予反正之年宜降異恩各膺寵命之語 據言松于詩外無他能時號

其啓事為送年腳狀然五七律時復有異句可誦 李肇國史補曲江大會先牒教坊請奏上御紫雲樓觀焉時或擬作樂則為之移日故松詩云追遊若遇三清樂行從應妨一日春 吟窗雜錄松有句云石脈水流泉滴沙鬼燈燃點松柏

花 王漁洋五代詩話錦綉萬花谷松句云鹿眠荒圃寒蕪白鴉噪殘陽敗葉飛 丹鉛總錄松中秋警句云華嶽影寒清露掌海門風急白潮頭松詩多淺俗以二句差有中唐之意

塞上行

上將擁黃鬚安西逐指呼離鄉俱少壯到磧減肌膚風雪夜傍塞腥羶朝繫胡為君樂戰死誰喜作征夫

山中言事

全五代詩

卷十九

嵐靄潤窗櫺。吟詩得冷癢。教餐有效藥。多媿獨行僧。雲溼煎茶火。冰封汲井繩。片扉深着掩。經國自無能。

山中

此地似商嶺。雲霞空往還。衰條難定鳥。缺月易依山。野色耕不盡。溪容釣自閒。分因多臥退。百計少相關。

崇義里言懷

馬蹄京洛岐。復此少閒時。老積滄洲夢。秋乖白閣期。平生五字句。一夕滿頭絲。把向侯門去。侯門未可知。

言懷

冥心坐似癡。寢食生如遺。爲覓出人句。祇求當路知。豈能窮到老。未信達無時。此道須天付。三光幸不私。

書懷

默默守吾道。望榮來替愁。吟詩應有罪。當路卻如讐。陸海儻難溺。九霄爭便休。敢言名譽出。天未白吾頭。

貽世

富者非義取。朴風爭肯還。紅塵不待曉。白首有誰閒。淺度四溟水。平看諸國山。只消年作劫。俱到總無間。

感世

觸目盡如幻。幻中能幾時。愁來捨行樂。事去莫吞悲。白髮不由已。黃金留待誰。耕煙得銘誌。翻爲古人思。

除夜

舊歷不足卷。東風還坐聞。一宵有幾刻。兩歲欲平分。臘盡傾時斗。春通綻處雲。明朝遙捧酒。先合祝吾君。

一本首句作殘臘卽又
盡第五作燦暗傾時斗

立春

春日一盃酒。便吟春日詩。木梢寒未覺。地脈煖先知。鳥嘯星沈後。山分雪薄時。寧無剪花手。贈與最芳枝。
雜詠作賞心無處
說悵望曲江池

立春

玉燭傳佳節。陽和應此辰。土牛呈歲稔。綵燕表年春。臘盡星回次。寒餘月建寅。梅花將柳色。偏思越鄉人。

晨起

曉色教不睡。卷簾清氣中。林殘數枝月。髮冷一梳風。並鳥聞鐘語。欹荷隔霧空。莫徒營白日。道路本無窮。

長安春日

浩浩看花晨。六街揚遠塵。塵中一丈日。誰是晏眠人。御柳舞着水。野鶯啼破春。徒云多失意。猶自惜離秦。

曲江暮春雪霽

霽動江池色。春殘一去游。菰風生馬足。槐雪滴人頭。北闕塵未起。南山青欲流。如何多別地。卻得醉汀洲。

九江暮春

楊柳城初鎖。輪蹄息去蹤。春流無舊岸。夜色失諸峰。影動漁邊火。聲遲話後鐘。明朝迴去雁。誰向北郊逢。

滕王閣春日晚望

凌春帝子閣。偶眺日移西。浪勢平花塢。帆陰上柳堤。凝嵐藏宿翼。疊鼓碎歸蹄。只此長吟咏。因高思不迷。

趙凡夫截前半

補萬首絕句誤

鍾陵野步

岡扉聊自啓。信步出波邊。野火風吹闊。春冰鶴啄穿。渚檣齊驛樹。山鳥入公田。未創孤雲勢。空思白閣年。

鈇山寫懷

天涯兵火後。風景畏臨門。骨肉到時節。團圓因夢魂。池塘縈水眼。嶺嶠結花根。耳縱聽歌吹。中心不可論。

岳陽晚泊

輕帆下闊流。便泊此沙洲。湖影撼山朵。日陽燒野愁。白波爭起倒。青嶼或沈浮。是際船中望。東南切切秋。

道中

出門嗟世路。何日樸風歸。是處太行險。□□應解飛。走人厚薄禮。客子新故衣。所以澆浮態。多令行者違。

南遊

直到南箕下。方諳漲海頭。君恩過銅柱。戎節限交州。犀占花陰臥。波衝瘴色流。遠夷非不樂。自是北人愁。

塞上

邊寒來所關。今日復明朝。河凌堅通馬。胡雲缺見鷗。砂中程獨泣。鄉外隱誰招。迴首若經歲。靈州生柳條。

石頭懷古

日月出又沒。臺城空白雲。雖寬百姓土。漸缺六朝墳。禾黍是亡國。山河歸聖君。松聲驟雨足。幾樹晚鐘聞。

弔北邙

山下望山上。夕陽明又曛。無人醫白髮。少地着新墳。歲代殊相遠。賢愚旋不分。東歸聊一弔。亂木倚寒雲。

再到洪州望西山

松常栖此山。

洪州向西顧。不忍暫忘君。記得瀑泉落。省同幽鳥聞。一迴經雨雹。長有剩風雲。未定卻栖息。前頭江海分。

望九華寄池陽太守

造化峰峰異。宜教岳德謙。靈蹤載籍古。怪刃刺雲尖。盤蹙陵陽壯。孤標建鄴瞻。霽餘堪洗目。青出謝家簷。

題甘露寺

香門接巨壘。畫閣間清鐘。北固一何峭。西僧多未逢。天垂無際海。雲白久晴峰。旦暮燃燈外。濤頭振蟄龍。

題湖南岳麓寺

海雲山上寺。每到每開襟。萬木長不住。細泉聽更深。蛭沾高雨斷。鳥遇夕嵐沈。此地良宵月。秋懷隔楚砧。

慈恩東樓

寺樓涼出竹。非與曲江賒。野火流穿苑。秦山疊入巴。風梢離衆葉。岸角積虛沙。此地鐘聲近。令人思未涯。

書翠岩寺壁

何年話尊宿。瞻禮此堂中。入郭非無路。歸林自學空。濺瓶雲嶠水。逆磬雪川風。時說南廬事。知師用意同。

信州聞通寺題僧砌下泉

細聲從嶠足。幽淡浸香墀。此境未開日。何人初見時。耗痕延黑蘚。淨罅吐微澌。應有喬梢鶴。下來當飲之。

題鶴鳴泉

仙鶴曾鳴處。泉兼半井苔。直峯拋影入。片月瀉光來。湫澗侵顏冷。深沈慰眼開。何因值丹頂。滿汲石瓶迴。

商山夜聞泉

瀉月聲不斷。坐來心益閒。無人知落處。萬木冷空山。遠憶雲容外。幽疑石縫間。那辭通曙聽。明日度藍關。

觀山寺僧穿井

雲僧鑿山井。寒碧在中庭。況是分巖眼。同來下石瓶。旁痕終變蘚。圓影卽澄星。異夜天龍蟄。應聞說葉經。

廬山訪賈匡

西城疾病日。此地少尋君。古跡春猶在。遙泉夜盡聞。片時三處雨。九疊幾重雲。到者皆忘寐。精神與俗分。

訪山友

一徑通高屋。重雲翳兩原。山寒初宿頂。泉落未知根。急雨洗荒壁。驚風開靜門。聽君吟廢夜。苦卻建溪猿。

宿溪僧院

年少雲溪裏。禪心夜更閒。煎茶留靜者。靠月坐蒼山。露白鐘尋定。螢多戶未關。嵩陽有石室。何日譯經還。

與胡汾坐月期貫休上人不至

掃庭秋漏滴。接話貴忘眠。靜夜人相語。低枝鳥暗遷。星圍南極定。月照斷河連。後會花宮子。應開石上禪。

覽春榜喜孫鄆成名

門外報春榜。喜君天子知。舊愁渾似雪。見日總消時。塔下牡丹氣。江頭楊柳絲。風光若有分。無處不相宜。

喜友人歸上元別業

一檣千里外。隱者興宜孤。落日長邊海。秋風滿故都。掩關苔色老。盤徑葉聲枯。匡岳來時過。遲迴絕頂無。

上廣州支使王拾遺

明時應不諫。天幕稱仙才。聘入關中去。人從帝側來。詩牕盛島嶼。檄盾照風雷。幾度陪旌節。營巡海色迴。

山中寒夜呈許棠

山寒草堂煖。寂夜有良朋。讀易分高燭。煎茶取折冰。庭垂河半角。牕露月微稜。俱入詩心地。爭無俗者憎。

贈華陰李明府

佩墨縣兼清。約關西近城。三峯豈不重。厚地戴猶輕。雪篠欹難直。風泉噴易橫。須知高枕外。長是勸民耕。

贈衡山麋明府

爲縣瀟湘水。門前樹配苔。晚吟公籍少。春醉積林開。滌硯松香起。擎茶岳影來。任官當此境。更莫夢天台。

贈餘干袁明府

一雨西成色。陶家心自清。山銜中郭分。雲卷下湖程。公署聞流水。人煙入廢城。難忘楚盡處。新有越吟生。

贈雷卿張明府

任官征戰後。度日寄閒身。封卷還高客。飛書問野人。廢田教種穀。生路遣尋薪。若起柴桑興。無先漉酒巾。

贈南陵李主簿

外邑官同隱。寧勞短吏趨。看雲情自足。愛酒逸應無。簟席彈棋子。衣裳惹印朱。仍聞陂水近。亦擬掉菰蒲。

浙右贈陸處士

靜節灌園餘。得非成隱居。長當庚子日。獨拜五經書。白浪吹亡國。秋霜洗太虛。門前是京口。身外不營儲。

贈胡處士

年光離岳色。帶疾臥南原。白日與無事。俗人嗔閉門。樵魚臨岸水。野鹿入荒園。莫問榮華事。清霜點髮根。

薦福寺贈棲白太師

才子紫檀衣。明君寵顧時。講昇高坐懶。書答重臣遲。瓶勢傾圓頂。刀聲落碎髭。還聞穿內去。隨駕進新詩。

青龍寺贈雲顛法師

紫檀衣且香。春殿日尤長。此地開新講。何山鎖舊房。僧名喧北闕。祖印續南方。莫惜青蓮喻。秦人聽未忘。

關山寄詩贈清越

不寄秦中酒。冥心祇似師。望山吟過日。伴鶴立多時。溝遠流聲細。林寒綠色遲。菴西蘿月夕。重得話空期。

慈恩寺貽楚霄上人

在秦生楚思。波浪接禪關。塔礙高林鳥。窗開白日山。樹陰移草上。岸色透庭間。入內談經徹。空攜講疏還。

貽住山僧

罷講巡巖塢。無窮得野情。臘高猶伴鹿。夏滿不歸城。雲朵緣崖發。峰陰截水清。自然雙洗耳。唯任白毫生。

林下書懷寄建州李員外

一從諸事懶。海上跡宜沈。吾道不當路。鄙人甘入林。雲垂方覓鶴。月溼始收琴。水石南州好。誰陪刻骨吟。

金陵道中寄

忍苦待知音。無時省廢吟。始爲分路客。莫問向隅心。嶠翠藏幽瀑。枝風下曉禽。憶君秋欲盡。馬上秣陵砧。

送胡中丞使日東

辭天理玉簪。指日使雞林。猶有中華戀。方同積水深。張帆度鯨口。銜命見臣心。渥澤遐宣後。歸期抵萬金。

送左協律京西從事

辟書來幾日。遂喜就嘉招。猶向風沙淺。非於甸服遙。時平無探騎。秋靜見盤鵬。若遣關中使。煩君問寂寥。

送邵安石及第歸連州覲

及第兼歸覲。宜忘涉驛勞。青雲重慶少。白日一飛高。轉楚聞啼狖。臨湘見疊濤。海陽沈飲罷。何地佐旌旄。

秋日送方干遊上元

天高淮泗白。料子趣修程。汲水疑山動。揚帆覺岸行。雲離京口樹。雁入石頭城。後夜分遙念。諸峰霜露生。

九江送方干歸鏡湖

一檣懸五兩。此日動歸風。客路拋湓口。家林入鏡中。談餘雲出嶠。詠苦月欹空。更若看鳩鵲。何人夜坐同。

都門送許棠東歸

舊客東歸遠。長安詩少朋。去愁分磧雁。行計逐鄉僧。華岳無時雪。黃河漫處冰。知辭國門路。片席認西陵。

送喻坦之遊太原

北鄙征難盡。詩愁滿去程。廢巢侵燒色。荒塚入鋤聲。逗野河流濁。離雲磧月明。并州戎壘地。角動引風生。

邊上送友人歸寧

鄉路穿京口。寧心去少同。日斜尋闕磧。春盡逐歸鴻。獨樹河聲外。凝笳塞色中。憐君到此處。卻背老萊風。

送德輝禪師

重禮石
霜長者

天涯緣事了。又造石霜微。不以千峰險。唯將獨影歸。有爲嫌假佛。無境是真機。到後流沙錫。何時更有飛。

弔賈島墓

先生不折桂。謫去抱何冤。已葬離燕骨。難招入劍魂。旅墳低卻草。稚子哭勝猿。冥寞如搜句。宜邀賀監論。

哭李頻員外

時在建州

出麾臨建水。下世在公堂。苦集休開篋。清資罷轉郎。瘴中無子奠。嶺外一妻孀。定是浮香骨。東歸就故鄉。

哭陳陶處士

園裏先生冢。鳥啼春更傷。空餘八卦樹。尙對一茅堂。白日埋杜甫。皇天無耒陽。如何稽古力。報答甚茫茫。

哭胡處士

邱中久不起。將謂詔書來。及見凌雲說。方知掩夜臺。白衣歸北路。元造亦遺才。世上亡君後。詩聲更大哉。

重哭胡處士

故人江閣在。重到事悠悠。無爾向潭上。爲吾傾甕頭。空餘赤楓葉。墜落釣魚舟。疑是冲虛去。不爲天地囚。

憶江南并悼亡友

前心柰兵阻。悔作豫章分。芳草未歸日。故人多是墳。帆行出岫雨。馬踐過江雲。此地一罇酒。當時皆以文。

月

寥寥天地內。夜魄爽何輕。頻見此輪滿。卽應華髮生。不圓爭得破。纔正又須傾。人事還相似。因知倚伏情。

夏雲

勢能成岳仞。頃刻長崔嵬。暝鳥飛不到。野風吹得開。一天分萬態。立地看忘回。欲結暑宵雨。先聞江上雷。

大僧院松

此木韻彌全。秋宵學瑟絃。空知百餘尺。未定幾多年。古甲磨雲拆。孤根捉地堅。

朱慶餘有旅雁捉孤鳥用字並奇

何當拋一

幹。作蓋道場前。

友人池上詠蘆

秋聲誰種得。蕭瑟在池欄。葉澁栖蟬穩。叢疎宿鷺難。歛煙宜早下。颯吹省先寒。此物生蒼島。令人憶釣竿。

顧少府池亭葦

池上分行種。公庭覺少塵。根離潮水岸。韻爽判曹人。正午迴魚影。方昏息鷺身。無時不動詠。滄海島思頻。

猿

曾宿三巴路。今來不願聽。雲根啼片白。峰頂擲尖青。護果憎禽啄。栖霜覩葉零。唯應臥嵐客。憐爾傍岳扃。

送人庭鶴

度歲休籠閉。身輕好羽儀。白雲原是伴。滄海得因誰。唳起遺殘食。盤餘在迴枝。條風頻雨去。只恐更相隨。

答匡山僧贈柳栗杖

栗杖出匡頂。百中無一枝。雖因野僧得。猶畏嶽神知。晝月冷光在。指雲秋片移。宜留引蹇步。他日訪峨眉。

觀華夷圖

落筆勝縮地。展圖當晏寧。中華屬貴分。遠裔占何星。分寸辨諸岳。斗升觀四溟。長疑未到處。一一似曾經。

古塚

代遠已難問。纍纍次古城。民田侵不盡。客路踏還平。作穴蛇分蟄。依岡鹿繞行。唯應風雨夕。鬼火出林明。

全五代詩卷二十

吳

曹松二

送陳樵校書歸泉州

臣塔列名題。詩心亦罕齊。除官京下闕。乞假海門西。別席侵殘漏。歸程避戰鼙。關遙秦雁斷。家近瘴雲低。候馬春風館。迎船曉月溪。帝京須早入。莫被刺桐迷。

武德殿朝退望九衢春色

玉殿朝初退。天街一望春。南山初過雨。北闕淨無塵。夾道天桃滿。連溝御柳新。蘇舒同舜澤。煦嫗並堯仁。佳氣浮軒蓋。和風襲縉紳。自茲憐萬物。同入發生辰。

梢雲

殊質資靈貺。陵空發瑞雲。梢梢含樹彩。郁郁動霞文。不比因風起。全非觸石分。葉光閒泛灩。枝彩靜氤氳。隱見心無宰。徘徊慶自君。翻飛如可託。長願在橫汾。

山中

要路豪家非往還。巖門先有不曾關。衆心惟恐地無剩。吾意亦憂天惜閒。白練曳泉窗下石。絳羅垂果枕